




Gij Gyaez Daxboh

父 亲 的 爱

武鸣县民族中学129班 潘 昊

Seizgan lumj raemx, miz haujlai saeh riengz seizgan siu deuz lo, hoeng, miz gienh saeh ndeu, hawj gou nanzlumz, caemh hawj gou gamjsouh daengz gij ndiepgyaez daxboh gig hungmbwk.

Ngoenzhaenx, gou caeuq gyoengq doih doxiu, itheij youq laj laeuz guh doxndoj. Laj laeuz miz gofaex、nyumqva、liengzdingz…… vanzlij miz giz dingzci, gig gvangq, habhoz gyoengqdou guh doxndoj, danghnaeuz mwngz mbouj sug giz deihfueg neix, yaek ra raen boux vunz ndeu gig hoj. Gyoengqdoih daengz caez lo, dou couh hainduj cou ciem, Daegdauh deng guh bouxra. Daegdauh couh ndwn youq laj liengzdingz geqsoq, dou couh bae ra dieg ndoj hwnjdaeu. Vihliux ra giz deihfueg redrwrwd ndeu, gou gizneix yawjyawj, gizhaenx yawjyawj, cungj mbouj muenxeiq. Daegdauh yaek geq sat lo, gou lij caengz ra raen giz ndoj, simvueng dangqmaz. Cingqdang gou mbouj miz saekdi banhfap seiz, fwt yawjraen aen gang ndeu, “deng lo, couh ndoj youq gizneix!” Gou angq ndaej ca di hemq ok sing, ganjvaiq buet gvaqbae. Hoeng, bouxlawz rox dangnaj miz ngauq rin ndeu, gou mbouj siujsim, deng daemjndoet, cingqnde laemx

roengz nga faex daengj hwnjdaeu ndeu, in dwk gou youq gizhaenx swenjyuyu, lwed sikhaek daj gyaeujhoq lae roengzdaeu, gou lau dwk naengh youq gizhaenx swenj daj hwnjdaeu. Gyoengqdoih dingqnyu gou daj, ganjvaiq buet gvaqdaeu, raen gij lwed gou lae mbouj dingz, caemh vueng lo, youq gizhaenx cienq bae cienq dauq, mbouj rox yaek baenzlawz guh, lij dwg Daegdauh siengj daengz, ganjvaiq buet okbae.

Yaep ndeu, daxboh daxmeh gou cungj buet roengzdaeu lo, raen gou naengh youq gizhaenx, ndwn cungj mbouj ndaej, daxmeh ganjgip umj gou, nai naeuz: “Mhouj youqgaen law, gaej daj lo!” Dingq daengz neix, gou engq daj lo, daxboh mbouj gangj saek coenz, de goengzyongq roengzdaeu, siengj yawj giz sieng gou, hoeng, gou lau in, dai lix hix mbouj hawj daxboh yawj. Daxboh huj lo, lumj duzuguk nei swenj naeuz: “Mwngz dwg boux vunzsai ndeu, roebdaengz di saeh yienghneix, couh daj mbouj dingz, suengq gijmaz vunzsai! Sikhaek dingz roengzdaeu!” Gou lau lo, sikhaek dingz roengzdaeu, song cehda yawjyawj daxmeh, maqmuengh de bang gou gangj song coenz vahnde. Daxmeh raen yienghneix, naeuz

doxboh: “Mwngz swenj gijmaz ne, de cungj in dwk hwnq mbouj ndaej lo……” “Mwngz caiq gangj, lienz mwngz hix deng in!” Daxboh hujdengdeng dwk naeuz. Daxmeh mbouj caiq gangjavah lo, mwhhaenx ndawsim gou in dangqmaz: Daxboh doiq gou baenzneix yak, gou baenz in de cungj mbouj gangj saek coenz unq, nanzdauh gou mbouj dwg de caenseng? Cingqdang ndawsim gou baenzeix siengj seiz, daxboh yawj gij sieng gou, naeuz: “Baksieng gig hung, aeu nyib mae cij ndaej.” Gangj sat couh aeu diuz buh de cug dawz gyaeujhoq gou, umj gou hwnj gwnz ci, hai ci soengq gou bae yihyen lo.

Daej daengz bakdou yihyen, gij heiq raemx siudoeq cung haeu aen ndaeng gou daeu, gou youh siengj daengz yaek nyib mae, nyaenx mbouj ndaej daj hwnjdaeu. “Daj gijmaz daj, lij caengz nyib mae ne, mbouj cinj daj!” Daxboh swenj naeuz. Caj daxboh bae gyau ngaenz seiz, gou caegcaeg cam daxmeh: “Meh, daxboh doiq gou caen yak, de dwg mbouj dwg bohlaeng gou ha?” Daxmeh riu lo, naeuz: “Mwngz siengj gvaq lawz bae lo? Mwngz dwg lwg caen seng de, mboujgvaq, daxboh mwngz miz di

beizheiq gaenj, cij doiq mwngz swenj hemq, gizaed de dwg gaenjieng mwngz, gyaez mwngz.” Mwhhaenx, gou rox lo, doengh gij neix caemh dwg cungj gyaez daxboh, de dwg vihliux gujli gou, hawj gou mbouj lau hojnanz, hag rox gwzfuz hojnanz, caencingq guh boux vunzsai ndeu, cij doiq gou swenj hemq.

Gvaq yaep ndeu, daxboh baegfofo dwk buet gvaqdaeu naeuz: “Vaiq gvaqbae, lwnz daengz gyoengqraeu lo.” Gangj sat, couh umj gou gvaqbae hawj canghyw siudoeq, yienzhouh cinjbei nyibcim. Dang gou raen fag cim myigyamyam haenx seiz, lau dwk daengx ndang saenz mbouj dingz, gou cix mbouj gamj daj, lau deng daxboh ndaq. Daxboh yawjyawj gou, naeuz: “Di in neix iq law, haebhaeb diuz heuj, laeplaep lwgda, yaepyet couh gvaqbae lo. Danghnaeuz caen dingj mbouj ndaej, mwngz couh gaem cik fwngz gou.”

Nyibcim seiz, gou roxninh gig in, aenvih canghyw aeu cim youq gwnz gyaeujhoq gou nyib, hoeng, gou youh mbouj roxninh in, aenvih daxboh maenhcwcdwd ndwn youq henz ndang gou, gou gaem cik fwngz de, roxninh sim gig onj, roxninh ndawsim raejurubrub, caiq hix mbouj roxninh in lo.

Gij ndiepgyaez daxboh, dwg saedsaed caihcaih, mbouj miz saek gawq vah gyaeu, mbouj miz saek gaiq dungcoz caenmaed; gij ndiepgyaez daxboh, dwg caemrwgrwg, mbouj cigciep byaujdz, miz seiz hawj vunz roxninh mbwq de. Hoeng, Gij ndiepgyaez daxboh youq ndaw sim gou yaenq ndaej cei q laeg cei q maenh.

(指导老师:黄素艳)



Danghnaeuz Gou Rox Bienq

假如我会变

Danghnaeuz gou rox bienq, gou yaek bienqbaenz duz roeg he, youq gwnzmbwn cwxcaih dwk mbin bae mbin dauq, caeuq fwjhau doxcup.

Danghnaeuz gou rox bienq, gou yaek bienqbaenz go nyw iq he, dawz guekcoj cang dwk loegyauyau.

Danghnaeuz gou rox bienq, gou yaek bienqbaenz go faex hung he, seizhah daiq liengzsangj hawj gyoengqvunz.

Danghnaeuz gou rox bienq, gou yaek bienqbaenz bonj saw he, bae daengz ndaw rungh, hawj gyoengq lwgnyez ndaw rungh ndaej hag cihsiz, hag vwnzva.

Danghnaeuz gou rox bienq, gou yaek bienqbaenz aen hojceh he, dawz gyoengqboux siengjniemh daxmeh haenx soengq ma ndaw rungh daxmeh gyoengqde, soengq ma mbanjranz gyaeunde gyoengqde.

Danghnaeuz gou rox bienq, gou yaek bienqbaenz ……

(ngeih nienzgaep Lij Siengj)

Vaiqvued Gvaq Betnyied Cibngux

快乐的中 秋 节

Betnyied cibngux daengz lo, gyoengq–vunz cungj yungh mbouj doeng fuengsik angqhoh ngoenzciet. Gou hix gig haisim, aenvih daxgux daengx ranz vunz yaek daeu ranz gou gwn caeuz.

Betnyied cibngux ngoenzneix, daxbuz caeuxcaux couh bae gwnzhaw cawx byaek lo. Daxboh daxmeh sousib aenranz, guh dwk seuqcingh cingjcaez, cang dwk gyaeunde dangqmaz. Gou gwn ngaiz le couh hainduj sij cozyez, gou siengj ganjvaiq guh cozyez sat le, lajbyonghngoenz couh ndaej haisim guhcaemz lo.

Lajbyonghngoenz, daeg nuengxbiuj gyoengqde daeu lo, daxboh daxmeh buenx daxgux caeuq augux ndoet caz gangjgoj, gou rag nuengxbiuj haeu rug gou bae guhcaemz. Daxbuz cawj caeuz.

Lajbyonghngoenz haj diemj lai cung, dou hainduj gwn caeuz lo. Va, byaekcaez caen lai! Miz baeu、gungq、bya’ ngaenz、nohsaz, lijimiz bit gug bizciuj gou cei q gyaez gwn haenx dem. Baez nyuq, heiqrang bongh haeu ndaeng daeu, nyex gou myaiz laecancan. Aen byaek neix feihdauh caen daegbied, bizciuj caeuq nohbit cuengq itheij cawj le, feih nohbit

engq rang engq diemz. Gou lij naeuz: “Gou gwn nohbit le rox mbouj rox laeufiz ha?” Guenj de fiz mbouj fiz, byaek ndeigwn sien gwn cij gangj. Daengx ranz vunz doq gwn doq lwnhgoj, caen vaiqvued.

Gwncaez sat le, gyoengq vunzhung gwn nyiedbingj gwn mak gangjgoj, gou caeuq daeg buengxbiuj haeu ndaw rugsaw bae yawj 《Meuz Caeuq Nou》, ndaw ranz cungj dwg singriu.

Baez betnyied cibngux neix caen vaiqlag ha! Gou youq ndawsim gouz naeuz: Maqmuengh daengx ranz vunz ciengxlwenx vuenyungz、bingzan.

(seiq nienzgaep Vangz Bingz)

